

Nooch uns die Sintflut!

Om vergangene Sunndaach hadde merr unne om Moo gestonne, de Karl, de Schorsch unn ich unn hawwe de Welle zugeguckt. Doo sacht uff oomol de Schorsch: Josses naa, habbder im Fernseh geseh, was ferr Wasser ewe uff de Welt erunner kimmt? Was doo in Schottland letzt Woch los war mett Erdrutsche unn so? Odder in Florida, was so enn Storm oorichte kann, 15 Milliarde Schade hawwese gesaacht. Odder die voorsch Woch in de Palz! Dess werdd alls schlimmer.

De Karl hott genickt: Doo brauchdsde doch gar nit so weit ze gehe, aach bei uns hier in de Eck, in Wissbade unn in Fronkfort, sogar in Flerschem sinn vor korzem en Haufe Keller voll gelaafe. Host Recht, Schorsch, dess werdd immer doller mettem Wasser. Ich frooch mich nor, wo kimmt dann die gonz Brieh her?

Ich saach: Ich habb doo moi Theorie: Ess werdd doch immer wärmer uff de Welt unn doo dut aach immer mehr Wasser verdunsde, geht in die Wolke, seechelt iwver Meer unn Lond und kimmt widder erunner. Unn je wärmers werdd, desto mehr Wasser geht hoch unn kimmt widder erunner.

De Schorsch hott mettem Kopp gewackelt: Unn warum werdds wärmer?

Gonz oofach, gebb ich zur Ontwort, weil merr alls mehr die Luft uffheize mettem Öl unn Benzin, was merr verbrenne. Dess iss wie im Treibhaus, wo merr ...

De Schorsch hott mich unnerbroche: Dess iss doch schlecht Gebabbel, Honnes. Ich habb gelese, dasses so Zeite mett Erwärmunge schunn immer gewwe hott, unn doomols hadd die die Menschheit noch koo Ölheizung, iss aach noch nit Audo gefahrn unn noch nit mettem Fluchzeuch geflooche.

De Karl hottem Schorsch Recht gewwe: Ess iss joo wirklich noch nit eraus, dass die Erwärmung uff de Erd von de Mensche gemacht werdd unn vom Verbrenne von Öl unn Benzin her kimmt. Dess muss joo erst noch bewiese werrn, unn die meisde Fachleit unn Politiker wolle erstemol abwarde, iwverall uff de Welt die Temperadurn messe losse unn dann erst wollese was Genaues saache.

Ich war nit oiverstonne: Karl, Schorsch, was machden ihr, wenn ihr uff de Audobohn fahrt unn seht vor eich was Uniwwersichtliches?

De Karl guckt mich oo: Ei ich brems erst emol, unn wenn ich seh, dass was nit stimmt, mach ich die Warnblinker oo unn fahr gonz langsam weider.

Moont de Schorsch: Awwer doo gibts so Dolle, die fahrn alls weider, weilse denke, bis ich dort hiekumm, werdds schunn widder weitergeh – unn dann krachts! Awwer was hotten dess mette Erwärmung unn mettem Wasser ze due?

Siehsde, sach ich, die Fachleit, die ihr moont, dess sinn so Dolle. Statt erstemol uff die Brems ze trete, werrd alls weidergemacht unn weidergemesse, unn wennse wirklich emol genau wisse was los iss, dann isse ze spät. Weil in de Zwischezeit werrd immer mehr Wasser hoch gehowwe unn immer mehr Wasser kimmt widder erunner.

Honnes, sacht de Karl, was machsde derr Gedonke - die paar Johr, die mir noch hawwe, die krieg merr noch erum, moonsde nit, Schorsch?

De Schorsch hott genickt: Nooch uns die Sintflut!

Siehsde, Schorsch, habb ich gesacht, genau dess moone die meisde Fachleit unn die meisde Politiker aach. Nor, die Sintflut kimmt schneller als merr all minonner glaawe - unn villeicht isse schunn doo!

Eiern Honnes